

中國古典文學基本叢書

白居易集

第二冊

顧學頤校點

白居易集

第二冊

中華書局

白居易集卷第十六

律詩

五言

七言

自兩韻至一百韻凡一百首

東南行一百韻〔一〕寄通州元九侍御、澧州李十一舍人、果州崔二十二使君、開州韋大員外、庾三十二補闕、杜十四拾遺、李二十助教員外、竇七

校書

南去經三楚，東來過五湖。山頭看候館，水面問征途。地遠窮江界，天低極海隅。飄零同落葉，浩蕩似乘桴。漸覺鄉原異，深知土產殊。夷音語嘲啗，蠻態笑睢盱。水市通閩閩，煙村混舳舻。吏徵魚戶稅，人納火田租。亥日饒蝦蟇，寅年足虎羆。成人男作𡗗，事鬼女爲巫。樓閣攢猖婦，隄喧簇販夫。夜船論鋪賃，春酒斷瓶沽。見果多盧橘，聞禽悉鷓鴣。山歌猿獨叫，野哭鳥相呼。嶺徼雲成棧，江郊水當郭。月橋翹柱鶴，風汎颭檣烏。鼃礙潮無信，蛟驚浪不虞。鼉鳴泉窟室〔一〕，蜃結氣浮圖。樹裂山魃穴，沙含水弩樞。喘牛犁紫芋，羸馬放青菰。繡面誰家婢？鵝頭幾歲奴？泥中採菱芡，燒後拾樵蘇。鼎膩愁烹鼈，盤腥厭

膾鱸。鍾儀徒戀楚，張翰浪思吳。氣序涼還熱，光陰旦復晡。身方逐萍梗，年欲近桑榆。渭北田園廢，江西歲月徂。憶歸恒慘澹，懷舊忽踟蹰。自念咸秦客，嘗爲鄒魯儒。蘊藏經國術，輕棄度關繻。賦力凌鸚鵡，詞鋒敵轆轤。戰文重掉鞅，射策一彎弧。崔杜鞭齊下，元韋轡並驅。名聲逼楊馬，交分過蕭朱。世務經磨揣，周行竊覲覩。風雲皆會合，雨露各霑濡。共偶昇平代，偏慚固陋軀。承明連夜直，建禮拂晨趨。美服頒王府，珍羞降御廚。議高通白虎，諫切伏青蒲。柏殿行陪宴，花樓走看酺。神旗張鳥獸，天籟動笙竽。丸劍星芒耀，魚龍電策驅。定場排漢旅，促座進吳歔。縹緲疑仙樂，嬋娟勝畫圖。歌鬢低翠羽，舞汗墮紅珠。別選閑遊伴，潛招小飲徒。一盃愁已破，三盞氣彌粗。軟美仇家酒，幽閑葛氏姝。十千方得斗，二八正當壚。論笑杓胡律，談憐鞏囁嚅。李酣尤短寶，庾醉更薦迂。較馬呼教住，骰盤喝遣輸。長驅波卷白，連擲采成盧。骰盤、卷白波、莫走、鞍馬、皆當時酒令。籌併頻逃席，觥嚴別置盂。滿卮那可灌，頽玉不勝扶。人視中樞草，歸乘內厩駒。醉曾衝宰相，驕不揖金吾。日近恩雖重，雲高勢却孤。翻身落霄漢，失脚到泥塗。博望移門籍，潯陽佐郡符。予自太子贊善大夫出爲江州司馬。時情變寒暑，世利算錙銖。即日辭雙闕，明朝別九衢。播遷分郡國，次第出京都。十年春，微之移佐通州。其年秋，予出佐潯陽。明年冬，杓直出牧澧州，崔二十二出牧果州，韋大牧開州。秦嶺馳三驛，商山上二邛。商山險道中，有東西二邛。峴陽亭寂寞，夏口路崎嶇。

大道全生棘，中丁盡執爰。江關未徹警，淮寇尚稽誅。時淮西未平，路經襄、鄂二州界，所見如此。林

對東西寺，山分大小姑。東林、西林寺在廬山北，大姑、小姑在廬山南彭蠡湖中。廬峯蓮刻削，湓浦帶縈

紆。蓮花峯在廬山北，湓水在江城南。何遜詩云：「湓城對湓水，湓水縈如帶。」九派吞青草，潯陽江九派，南通青

草、洞庭湖。孤城覆綠蕪。南方城壁，多以草覆。黃昏鐘寂寂，清曉角鳴鳴。春色辭門柳，秋聲到井

梧。殘芳悲鶉鴂，音啼決，見《楚詞》。暮節感茱萸。蘼圻金英菊，花飄雪片蘆。波紅日斜沒，沙

白月平鋪。幾見林抽筍？頻驚燕引鵲。歲華何倏忽？年少不須臾！眇默思千古，蒼茫想八

區。孔窮緣底事？顏天有何辜？龍智猶經醢，龜靈未免刳。窮通應已定，聖哲不能逾。況我

身謀拙，逢他厄運拘。漂流隨大海，鎚鍛任洪爐。險阻嘗之矣，栖遲命也夫！沈冥消意氣，窮

餓耗肌膚。防瘴和殘藥，迎寒補舊襦。書牀鳴蟋蟀，琴匣網蜘蛛。貧室如懸磬，端憂劇守株。

時遭人指點，數被鬼揶揄。兀兀都疑夢，昏昏半似愚。女驚朝不起，妻怪夜長吁。萬里拋

朋侶，三年隔友于。自然悲聚散，不是恨榮枯。去夏微之瘴，今春席八殂。天涯書達否？

泉下哭知無？去年，聞元九瘴瘡，書去竟未報。今春，聞席八歿。久與還往，能無慟矣！謾寫詩盈卷，空盛

酒滿壺。只添新悵望，豈復舊歡娛？壯志因愁減，衰容與病俱。相逢應不識，滿領白髭鬚！

〔一〕《才調集》無「寄」字以下共五十字。

〔二〕鼉鳴句——《才調集》作「鼉鳴江搥鼓」，《全唐詩》同。

謫居

面瘦頭斑四十四，遠謫江州爲郡吏；
逢時棄置從不才，未老衰羸爲何事？
火燒寒澗松爲燼，霜降春花委地；
遭時榮悴一時間，豈是昭昭上天意？

初到江州，寄翰林張、李、杜三學士

早攀霄漢上天衢，晚落風波委世途。
雨露施恩無厚薄，蓬蒿隨分有榮枯。
傷禽側翅驚弓箭，老婦低顏事舅姑。
碧落三仙曾識面，年深寄得姓名無？

庾樓曉望

獨憑朱檻立凌晨，山色初明水色新。
竹霧曉籠銜嶺月，蘋風暖送過江春。
子城陰處猶殘雪，衙鼓聲前未有塵。
三百年來庾樓上，曾經多少望鄉人！

宿西林寺

木落天晴山翠開，愛山騎馬入山來。
心知不及柴桑令，一宿西林便却迴。
柴桑令，劉遺民是也。

江樓宴別

樓中別曲催離酌，燈下紅裙間綠袍。縹緲楚風羅綺薄，
鉦縱越調管絃高。寒流帶月澄如鏡，夕吹和霜利似刀。
樽酒未空歡未盡，舞腰歌袖莫辭勞！

題山石榴花

一叢千朵壓欄干，翦碎紅綃却作團。風嫋舞腰香不盡，
露銷粧臉淚新乾。薔薇帶刺攀應懶，菡萏生泥玩亦難。
爭及此花簷戶下？任人採弄盡人看。

代春贈

山吐晴嵐水放光，辛夷花白柳梢黃。但知莫作江西意，
風景何曾異帝鄉？

答春

草煙低重水花明，從道風光似帝京。其奈山猿江上叫，
故鄉無此斷腸聲！

櫻桃花下歎白髮

逐處花皆好，隨年貌自衰。紅櫻滿眼日，白髮半頭時。
倚樹無言久，攀條欲放遲。臨風兩堪歎，如雪復如絲！

惜落花，贈崔二十四

漠漠紛紛不奈何，狂風急雨兩相和。晚來悵望君知否？
枝上稀疏地上多！

移山櫻桃

亦知官舍非吾宅，且斷山櫻滿院栽。上佐近來多五考，
少應四度見花開。

官舍閑題

職散優閑地，身慵老大時。送春唯有酒，銷日不過棋。
祿米麤牙稻，園蔬鴨脚葵。飽餐仍晏起，餘暇弄龜兒。
龜兒，卽小姪名。

晚春登大雲寺南樓，贈常禪師

花盡頭新白，登樓意若何？歲時春日少，世界苦人多！愁醉非因酒，悲吟不是歌。求師治此病，唯勸讀楞伽。

北樓送客歸上都

憑高送遠一悽悽，却下朱欄卽解攜。京路人歸天直北，江樓客散日平西。長津欲度迴船尾，殘酒重傾簇馬蹄。不獨別君須強飲，窮愁自要醉如泥。

北亭招客

疏散郡丞同野客，幽閑官舍抵山家。春風北戶千莖竹，晚日東園一樹花。小盞吹醅嘗冷酒，深爐敲火炙新茶。能來盡日官棋否？太守知慵放晚衙。

宿西林寺、早赴東林滿上人之會，因寄崔二十二員外

謫辭魏闕鵝鸞隔，老人廬山麋鹿隨。薄暮蕭條投寺宿，凌晨清淨與僧期。雙林我起聞鐘後，隻日君趨入閣時。鵬鷗高低分皆定，莫勞心力遠相思。

遊寶稱寺

竹寺初晴日，花塘欲曉春。野猿疑弄客，山鳥似呼人。酒嬾傾金液，茶新碾玉塵。可憐幽靜地，堪寄老慵身！

早春聞提壺鳥，因題鄰家

厭聽秋猿催下淚，喜聞春鳥勸提壺。誰家紅樹先花發？何處青樓有酒沽？進士簷豪尋靜盡，拾遺風彩近都無。欲期明日東鄰醉，變作騰騰一俗夫。

見紫薇花，憶微之

一叢暗淡將何比？淺碧籠裙襯紫巾。除却微之見應愛，人間少有別花人。

薔薇花一叢獨死，不知其故，因有是篇

柯條未嘗損，根蔕不曾移；同類今齊茂，孤芳忽獨萎。仍憐委地日，正是帶花時！碎碧初凋葉，焦紅尚戀枝。乾坤無厚薄，草木自榮衰。欲問因何事？春風亦不知。

湖亭望水

久雨南湖漲，新晴北客過。日沉紅有影，風定綠無波。岸沒閭閻少，灘平船舫多。可憐心賞處，其奈獨遊何？

閑遊

外事因慵廢，中懷與靜期。尋泉上山遠，看笋出林遲。白石磨樵斧，青竿理釣絲。澄清深淺好，最愛夕陽時。

憶微之、傷仲遠

李三仲遠，去年春喪。

幽獨辭羣久，漂流去國賒；只將琴作伴，唯以酒爲家。感逝因看水，傷離爲見花。李三埋地底，元九謫天涯。舉眼青雲遠，迴頭白日斜。可能勝賈誼？猶自滯長沙！

過鄭處士

聞道移居村塢間，竹林多處獨開關。故來不是求他事，暫借南亭一望山。

霖雨苦多，江湖暴漲，塊然獨望，因題北亭

自作潯陽客，無如苦雨何！陰昏晴日少，閑悶睡時多。湖闊將天合，雲低與水和。籬根舟子語，巷口釣人歌。霧鳥沉黃氣，風帆蹙白波。門前車馬道，一宿變江河。

春末夏初，閑遊江郭二首

閑出乘輕屐，徐行蹋軟沙。觀魚傍湓浦，看竹入楊家。湓浦多魚；浦西有楊侍郎宅，多好竹。林迸穿籬笋，藤飄落水花。雨埋釣舟小，風颺酒旗斜。嫩剥青菱角，濃煎白茗芽。淹留不知夕，城樹欲栖鴉。

柳影繁初合，鶯聲澀漸稀。早梅迎夏結，殘絮送春飛。西日韶光盡，南風暑氣微。展張新小簾，熨帖舊生衣。綠蟻杯香嫩，紅絲餽縷肥。故園無此味，何必苦思歸？

紅藤杖 杖出南蠻。

南詔紅藤杖，西江白首人；時時携步月，處處把尋春。勁健孤莖直，疏圓六節勻。火山生處遠，瀘水洗來新。粗細纔盈手，高低僅過身。天邊望鄉客，何日拄歸秦？

風雨中尋李十一，因題船上

匹馬來郊外，扁舟在水濱。可憐衝雨客，來訪阻風人！小榼沽清醕，行厨煮白鱗。停杯看柳色，各憶故園春。

題廬山山下湯泉

一眼湯泉流向東，浸泥澆草煖無功。驪山溫水因何事，流入金鋪玉甃中？

寄蘄州簞與元九，因題六韻

時元九鰥居。

笛竹出蘄春，霜刀劈翠筠。織成雙入簞，寄與獨眠人。卷作筒中信，舒爲席上珍。滑如鋪薤葉，冷似卧龍鱗。清潤宜乘露，鮮華不受塵。通州炎瘴地，此物最關身。

秋熱

西江風候接南威，暑氣常多秋氣微。猶道江州最涼冷，至今九月著生衣。

題元八_{〔一〕}八_{〔二〕}谿居

溪嵐漠漠樹重重，水檻山窗次第逢。晚葉尚開紅躑躅，秋房初結白芙蓉。聲來枕上千年鶴，影落杯中五老峯。更愧殷勤留客意，魚鮮飯細酒香濃。

〔一〕詩題原本誤作「元八」，「元」下脫「十」字；今據本集詩、文補正。元十八，卽元集虛。

晚出西郊

散吏閑如客，貧州冷似村。早涼湖北岸，殘照郭西門。懶鑷從鬚白，休治任眼昏。老來何所用？少興不多言。

階下蓮

葉展影翻當砌月，花開香散入簾風。不如種在天池上，猶勝生於野水中。

端居詠懷

賈生俟罪心相似，張翰思歸事不如。斜日早知驚鵬鳥，秋風悔不憶鱸魚！胸襟曾貯匡時策，

懷袖猶殘諫獵書。從此萬緣都擺落，欲攜妻子買山居。

夜宿江浦，聞元八改官，因寄此什

君遊丹陛已三遷，我汎滄浪欲二年。劍珮曉趨雙鳳闕，煙波夜宿一漁船。交親盡在青雲上，鄉國遙拋白日邊。若報生涯應笑殺，結茅栽芋種畬田！

百花亭

朱檻在空虛，涼風八月初。山形如峴首，江色似桐廬。佛寺乘船入，人家枕水居。高亭仍有月，今夜宿何如？

江樓早秋

南國雖多熱，秋來亦不遲。湖光朝霽後，竹氣晚涼時。樓閣宜佳客，江山入好詩。清風水蘋葉，白露木蘭枝。欲作雲泉計，須營伏臘資。匡廬一步地，官滿更何之？

送客之湖南

年年漸見南方物，事事堪傷北客情。山鬼趨跳唯一足，峽猿哀怨過三聲。帆開青草湖中

去，衣濕黃梅雨裏行。別後雙魚難定寄，近來潮不到湓城。

百花亭晚望夜歸

百花亭上晚徘徊，雲景陰晴掩復開。日色悠揚映山盡，雨聲蕭颯渡江來。鬢毛遇病雙如雪，心緒逢秋一似灰。向夜欲歸愁未了，滿湖明月小船迴。

西樓

小郡大江邊，危樓夕照前。青蕪卑濕地，白露沈寥天。鄉國此時阻，家書何處傳？仍聞陳蔡戍，轉戰已三年！

尋李道士山居，兼呈元明府

盡日行還歇，遲遲獨上山。攀藤老筋力，照水病容顏。陶巷招居住，茅家許往還。飽諳榮辱事，無意戀人間。

四十五

行年四十五，兩鬢半蒼蒼。清瘦詩成癖，粗豪酒放狂。老來尤委命，安處卽爲鄉。或擬廬山下，來春結草堂。

寄李相公、崔侍郎、錢舍人

曾陪鶴馭兩三仙，親侍龍輿四五年。天上歡華春有限，世間漂泊海無邊！榮枯事過都成夢，憂喜心忘便是禪。官滿更歸何處去？香爐峯在宅門前。

廳前桂

天台嶺上凌霜樹，司馬廳前委地叢。一種不生明月裏，山中猶校勝塵中。

尋王道士藥堂，因有題贈

行行覓路緣松嶠，步步尋花到杏壇。白石先生小有洞，黃牙姪女大還丹。常悲東郭千家塚，欲乞西山五色丸。但恐長生須有籍，仙臺試爲檢名看！

秋晚

籬菊花稀砌桐落，樹陰離離日色薄。單幕疏簾貧寂寞，涼風冷露秋蕭索。光陰流轉忽已